

東
華
續
錄

東華續錄

咸豐四十七

臣王先謙敬編

臣陶潛宣恭校

夏四月癸巳朔山東巡撫崇恩奏石邑盜艇截劫浙江海運米石
檄飭登州鎮設法搜捕得旨田浩然前在江南朕未聞其捕務若
何見在登鎮是否勝任有無捏飾稟報身體孱弱等情著迅速飭
查據實覆奏○甲午常雩祀 天於 圓丘○乙未諭內閣何桂

清奏遵查革員貽誤地方各情一摺已革安徽甯池太廣道兼署
徽州府印務恩禧於賊匪竄擾徽州不能實力堵剿致府縣數城
先後失陷實屬貽誤地方經學政沈祖懋於該郡失守後查恩禧
尙無下落乃敢以由績溪間道往迎鄧紹良會剿等詞希圖掩飾
並於原參扣留捐項積欠勇糧各情曉曉置辯更屬狡詐恩禧業

經革職著卽拏問交何桂清嚴行審訊按律定擬具奏○諭何桂清奏克復婺源縣城徽境平靖一摺逆匪自休甯敗潰後由黟縣一帶糾同餘黨攜脅多人復竄陷婺源縣城鄧紹良石景芬接據探報各督率將弁拔營前進齊抵婺源縣境分投布置遊擊周天受等帶川兵進攻東門已革知縣唐寶昌等帶勇由陸路前進石景芬等由水路前進直逼北門該逆見我軍初到大隊齊出我軍奮力接仗自寅至辰鏖戰三時之久城中伏有練勇同時內應賊匪潰亂奔出官兵奮勇夾擊共擒斬五百餘名落水溺斃不計其數當將婺源縣城克復逆匪竄擾徽郡疊陷城池經鄧紹良等跟蹤合剿全股掃蕩勦辦尙屬迅速所有出力各員著何桂清覈實保奏○諭軍機大臣等何桂清奏克復婺源縣城徽州全境平靖一摺逆賊竄擾徽郡經官軍協力攻剿月餘以來將郡縣城池次

第克復辦理尙爲迅速此後防堵事宜自應合徽甯兩府通盤籌畫應如何派撥兵勇扼守要隘之處卽著妥爲布置至逆賊之得以肆擾總由土匪潛爲勾結此次不法匪徒亟宜密速搜捕以淨根株並著何桂清諭令石景芬等勸諭該處紳士辦理保甲團練事宜內絕土匪之勾通外杜賊匪之窺伺務期實力舉行毋得有名無實其餘一切善後章程均著隨時奏報廣德州捐輸前經該撫奏明照甯國府辦理該州逼近賊氛其如何辦理團練以期聯絡聲勢之處並著設法勸導以期周密江西省賊匪由樂平德興竄入弋陽浙省衢州府情形喫重該撫前後調派兵勇約其五六千名除畱守徽州外當尙足敷防堵不至有內竄之虞所有閩省派出官兵一千名卽著該撫遵照前旨飭令前赴廣信與江西官兵合力攻剿無稍延誤將此由六百里諭令知之○諭前因江浙

海運米船在東省洋面被劫曾諭令直隸江蘇山東各省撫嚴密防護本日據全慶文彩奏續到米船安穩抵津並據押運紳董稟報余山一帶有破艇船三四隻遊駛洋面石島地方有艇船五六隻停泊島外並有官商各船被截島內又聞石島船匪於勒銀後揚帆南下等語又據怡良邵燦奏江浙海運新漕接續放洋並追捕余山洋面盜艇各摺片見在海運米船源源北上其石島艇匪雖經遠颺難保不沿途爲害破艇三四隻據稱尙在洋面遊駛是余山一帶盜船盤踞仍恐未能淨盡著兩江漕運江蘇浙江各督撫飭令承辦各員諄諭放洋各船務須同幫行走彼此聲勢聯絡俾免疏失至本年蘇省水師大半調赴攻剿其巡洋護漕兵船不及往年十分之三勢難分赴山東洋面協同防護著崇恩仍遵前旨嚴飭田浩然並巡洋員弁實力防範不得因艇匪遠颺稍形疏

懈其石島地方艇匪截劫官商各船並著一體嚴拏以安行旅將此由六百里各諭令知之○以克復婺源縣城賞知府石景芬巴圖魯名號復鄧紹良提督銜餘升敘有差○丙申諭軍機大臣等向榮奏師船進剿疊獲勝仗一摺覽連日進仗情形各師船甚爲得力大軍沿江上剿必須兩岸陸兵接應該大臣已飭鄧紹良出剿江甯鎮三山營一帶復令張光第進紮石碇橋以圖進扼烏江是南北兩岸官兵均可漸逼江岸與水軍聲勢聯絡此項師船自回攻九洲後總未遇有順風見在正值風利業已打過三山江口止宜有進無退如果因船少無援則兩岸調撥陸兵或從下游併力急攻均可分賊猖獗之勢著向榮吉爾杭阿妥籌接應務使師船節節上駛突過梁山以上方能逐漸進剿但師船愈上愈遠三山兩岸屯聚賊船轉在我船之下必須痛加剿洗庶免腹背受

敵賊中所有江西遺失戰艇最爲利器儻該逆漸諳駕使不特爲紅單各船後路之患卽內河亦防其衝突總須設法埽除其餘賊船雖多便無足慮諒該大臣等亦所深悉也將此由六百里加緊各諭令知之○諭前因葉名琛奏請派總兵謝焜赴晉甯剿匪當以該總兵係帶船赴江南助剿之員著該督仍令統帶師船赴江或另派得力將弁統帶之處並著斟酌辦理未據葉名琛將開行日期奏報本日據向榮奏師船三月初七日斬斷下關賊鍊上駛後復疊獲勝仗我船亦損傷數隻見在三山江面賊船甚多並極堅利意欲於石磧橋一帶截我糧運勢甚猖獗我船爲數較少請催續調之廣東省紅單等船迅來江面助剿等語江南師船剿辦賊匪正屬得手惟賊匪船隻極多且船礮甚爲堅利自應厚集兵力以期併力攻剿著葉名琛將前次奏明續雇之紅單船二十四

隻並挖罾等船隻剋日配齊并兵器械並將兵勇口糧等措備齊全仍派令謝焜統帶迅速前赴江南助剿毋許再延儻謝焜以剿捕本省賊匪不能分身卽著遵照前旨另派得力將弁管帶總期卽日開行毋誤剿辦並著將開行日期速行馳奏將此由六百里加緊諭令知之○諭四川學政何紹基奏川省詞訟拖延折辱士子等語原片內所指合江縣廩生李暄通賊一案又南溪縣廩生萬時恬被控謀叛一案是否實無左證抑或並無冤抑何以展轉耽延日久未結著黃宗漢確切訪查親提研訊據實具奏該學政所稱上司袒護屬員以致士風激成刁健等情是否實有此種風氣亦著查明具奏原片著鈔給閱看將此諭令知之○予福建殉節縣丞李彥清等祭葬世職○丁酉諭內閣何紹基奏縷陳管見一招所陳十二條雜出不倫或本有成例或妄議更張窒礙居多

未能按切時務惟皇史宬應灑埽潔清一條該處尊藏 列聖實錄金匱莊嚴所稱數年前見有塵土堆積之處著該管衙門查看隨時拂拭以昭敬謹至國史臣工列傳雖乾隆年間曾奉 上諭列傳體例以人不以官而以後仍限以官階原以大臣列傳之外尚有儒林文苑循吏等傳苟其人事功品學卓卓可稱官秩雖卑亦無虞湮沒若如所奏三品以下補行立傳無論二百年來人數浩繁蒐羅難徧且必致憑史官之好惡以爲去取非所以昭傳信其請遇奔競一條人品不齊卑諂夤緣久干例禁若謂兩書房清祕堂及各衙門京察優等人員多由昏暮營求信口譏評殊不足以昭公論至丁憂人員乾隆年間既有 諭旨不准主講書院自應永遠遵循若官員服闋尙未葬親卽不准其服官我朝並無此例該員欲以魏晉之制施之今日尤屬泥古鮮通學政無論官階

悉與督撫平行惟年終有學政聲名之奏原係互相糾察並非遂
爲統屬學政苟稍知自愛何至卑污要結何紹基身任學政而以
此言入奏尤屬非是况欽差查辦事件理應慎密該學政以奏參
各件閱不使知心懷不平亦屬私見又嘉慶年間 諭旨准令道
員奏事係爲勤求民隱起見見在亦並未不准道員奏事而該員
等既無可敷陳亦不能強之陳奏至捐納知府州縣考試文章向
來皆延幕友閱校將來去取仍歸學政無關得失其府縣兼管武
營前經有人陳奏經部議駁著毋庸議各省駐防改試繙譯原係
皇考崇實黜浮造就旗僕之意該駐防人等果能弓馬嫻熟清
文通順不患無登進之路又添設繙譯翰林一途不爲不優何至
指爲向隅並牽涉倭仁瑞常直似八旗駐防除此二人之外遂無
人才實屬肆意妄言不知大體况當科場年分陳奏考試事宜尤

屬違例何紹基著交部議處此外各條皆非學政分內之事亦非
今日救時急務均著毋庸置議○戊戌諭軍機大臣等前因海運
米船在東省洋面被劫並石島地方艇匪截劫官商各船疊經諭
令崇恩嚴飭巡洋將弁實力查拏本日據匡源奏三月十二日有
匪船五隻約三四百人在卽墨縣之金口擄去商船五隻勒銀回
贖又於膠州地面開放大礮擄船二隻復駛至青島地方開礮擊
毀民房數處擄去水手數名截劫貨船一隻等語見在海運米船
源源北上東省沿海各處水師員弁不知認真巡哨致匪船行劫
層見疊出實屬不成事體著崇恩迅將該處將弁確切查明從嚴
參辦又據片奏登州營遊擊羅朝輔於匪船誤陷淺沙之時託病
推諉不卽帶兵轟擊使匪船得以遠颺尤屬庸懦無能並著該撫
一併查明據實參辦無稍徇隱原摺片均著鈔給閱看將此由五

百里諭令知之○己亥諭內閣勞崇光惠慶奏知縣遇賊被戕見在查辦等語代理廣西永福縣知縣洪運昌因堵剿賊匪在所屬四季嶺地方猝被戕斃據永福縣紳士指稱爲臨桂團練所害而臨桂西鄉團總則稱賊匪假冒團練突將該縣衝殺各執一詞自應確切查明以憑拏辦著勞崇光卽飭該二縣文武迅將該員被害原委切實查報無任推諉其戕官正犯卽著趕緊查拏務獲盡法懲治以儆兇頑○諭勞崇光惠慶奏游匪戕官踞城經兵練會同楚省兵勇擊退一摺廣西恭城縣匪徒於正月十七日竄撲富川縣城署知縣濟昌登陴守禦因賊匪人眾致被闖入濟昌罵賊不屈被匪戕害旋經各路官兵團練合力圍剿並湖南候補同知王鑫等帶兵會剿至二月二十九日該匪潛行潰出經兵勇截殺多名堵回恭城復被恭城團練殲斃五百餘名餘匪向灌陽逃竄

廣西署富川縣事知州銜臨桂縣知縣濟昌平日能得民心因兵
單力竭遇害殊堪憫惻著交部從優議卹陣亡之富賀營千總秦
德種並著交部議卹富川城守營把總毛色馨著先行革職其是
否先期出城抑係臨時逃避著與不知下落之署典史宋履元訓
導蔣農藻一併交勞崇光嚴查覈辦所有逃竄餘匪並著督飭兵
勇實力搜剿毋任延蔓○諭軍機大臣等本日據官文奏賊蹤不
至西竄荊州地方安堵又據英桂奏賊復竄偏德安河南邊防喫
緊各一摺該逆自小河溪竄回武漢本未大受懲創其去而復來
固在意計之中英桂所稱三月二十八日劉富成等接仗失利退
至平林市地方事在官文發報以後此時江北情形不得謂賊鋒
稍挫楊需退紮隨州其始意原爲援應襄陽今扎拉芬已抵樊城
與襄陽一江之隔所帶陝兵即可由彼直下而楊需逗留襄陽日

久未據奏報軍情觀其咨會官文英桂之語總欲俟北兵全到方圖下擊是坐擁多兵徘徊於隨州棗陽之間迹似居中調度實則進退無據前此奏報收復德安不過撫拾各屬稟報之詞均於大股賊匪無涉此後賊回漢口復竄應山均未迅速入奏豈江北一帶遂可安然坐鎮耶見在常亮所帶馬隊早抵南陽計日當可與扎拉芬會合扎拉芬後起官兵想亦陸續趕到卽著該將軍整隊前進與楊需合兵下擊不得任令楊需藉口耽延孔廣順所帶步隊到信陽者已有兩起英桂擬令徑赴德安毋庸繞道隨州所見甚是楊需若仍在隨州坐待北兵是故爲紆折之計置江北大局於不顧自問當得何罪荊州見在雖尙安堵兵力仍形單薄逆匪詭譎異常難保不尙圖窺伺官文但當妥爲防禦力保荊郡宜昌匪徒尤當設法肅清以通川兵川餉入楚之路所屬餉銀見在川

陝兩省均有續報啟程之款著官文專弁催提到楚與楊需軍營通融分用楊需何日由隨州進兵札拉芬何時與楊需會合均著速行馳奏南岸武昌一帶據英桂探報連日均有勝仗而官文奏報常恩到荊州並未述及是否確有捷音亦著迅速探明奏報將此由六百里加緊各諭令知之○諭勞崇光惠慶奏酌保出力官紳兵練等各摺片均已明降諭旨分別辦理矣廣西省土匪蠭起四處蔓延卽如勞崇光等本日所奏永福甯陽朔臨桂荔浦等處均被匪擾恭城游匪攻陷富川興平股匪並敢直撲省城雖經官兵團練先後剿捕或殲斃首逆或登時擊退而此剿彼竄並未能淨絕根株著勞崇光惠慶督飭各該地方官並帶兵員弁將敗竄零匪實力搜除毋得稍畱餘孽至廣東湖南交界處所如有匪徒滋事卽知會該兩省文武協同剿捕毋任彼此句結致辦理愈

難措手弭敬修見經帶兵進攻肇慶並著督飭兵練相機接應
令孤軍深入致有疏失將此由四百里諭令知之○諭英桂奏楚
北逆匪復竄偏德安嚴防豫南邊境一摺該逆前由小河溪退回
武漢因聞武昌官兵連獲勝仗不敢上竄復折回孝感縣楊店地
方分股竄擾偏近德安見在羅山之九里關及信陽三關情形喫
重該撫已派委員弁添募鄉勇分投防堵布置尙屬周密其孔廣
順所帶步隊官兵計日可全抵信陽該撫見將此項官兵暫屯關
外與邱聯恩互爲聲援並卽由信陽出關徑取德安毋庸繞道隨
州致多紆折又因豫省勇多兵少已將山東壯勇一千名截回當
俟馮官屯殘匪掃數殲除再行酌調官兵赴豫協剿楊需見在隨
州已諭令趕緊進剿惟該督所帶兵勇屢經潰敗恐難得力著英
桂卽催令常亮所帶馬隊星速前進趕赴楊需軍營聽候調遣仍

嚴飭該鎮道等於各處要隘加意防備斷不可稍有疏懈其楚北賊情仍著確切偵探隨時具奏將此由六百里加緊諭令知之○予廣西陣亡知府劉繼祖等祭葬世職○庚子諭內閣戶部奏請飭催豫東漕糧一摺本年河南山東應運漕糧經戶部節次行催河南尚未報實徵數目山東亦未報開兌日期見在節交夏令已逾抵通例限天庾正供豈容任意延宕著英桂崇恩各將該省應運漕糧飭屬趕辦剋期開行務期以速補遲毋得稍稽時日儻再敢藉詞延緩卽著該部嚴行參奏以肅漕政○安徽學政沈祖懋奏請將徽州府暫歸浙江管轄得旨尙有窒礙之處汝未深悉前據何桂清奏已允其請仍歸浙經理實與管轄無異○辛丑諭內閣駱秉章奏湖南南路官軍勦辦廣東廣西賊匪疊獲勝仗收復城池並辦理本省土匪擒獲逆渠匪目多名一摺湖南南界與兩

粵毗連各處賊匪時虞竄越經駱秉章派撥兵勇疊次痛剿其廣東連州之賊猶竊踞城池抵死抗拒駱秉章派令卽補知府王葆生卽補參將李輔朝帶勇相機進剿疊獲勝仗焚戮無算卽將連州及三江營城收復樂昌之賊竄擾仁化並分陷湖南桂陽縣城署郴州知州戚天保卽補知州趙啟玉等軍會合堵剿連獲大勝旋將桂陽縣城收復仁化之賊犯擾桂陽縣東嶺等處趙啟玉等督率團勇擊退大加擒戮餘匪遁回其廣西之賊經湖南官軍屢次越剿本年正月忽有股匪自古城西嶺而來攻陷富川縣城委員王鑫卽補參將周雲耀各帶兵勇由江華縣進剿獲勝賊復勾合連州敗匪從龍虎關竄逼湖南永明縣城王鑫等督率兵勇掩甲疾趨前往救援奮勇衝殺大加剿洗其計斃賊約二千名並賊目多名窮追三十餘里餘匪竄逃其湖南本省土匪與粵匪勾結

滋擾被勦紛竄守備譚瓊林帶勇追勦至郴桂交界會合團紳分
路夾擊斃賊五六百名生擒匪目譚光開等百餘名嘉禾敗匪全
股肅清其竄逸者復經各團捆送百數十名其最爲著名之逆渠
邱倡道卽朱九濤尹石保二犯經署郴州戚天保等於該州之周
源山及藍山縣拏獲正法辦理均尙妥協著駱秉章仍督該員弁
等實力堵勦毋分畛域並按緝餘匪務期淨盡所有打仗陣亡之
武舉何魁著照把總例議卹文生侯東著照從九品例議卹武生
黃騰驤劉澍勻六品軍功童生何皆善何修善均著照外委例議
卹卽選同知直隸州知州王鑫勦辦富川股匪尤爲出力著以知
府遇缺卽選以示鼓勵其餘在事出力弁勇著該撫擇尤保奏候
朕施恩○諭軍機大臣等赫特賀諄齡奏廓爾喀兵侵占唐古忒
地方並赫特賀擬親往後藏邊界請暫畱諄齡辦理前藏事務各

一摺廓爾喀國自上年十月屢次與唐古忒尋釁見復擁兵數千
占踞濟隴並奪去聶拉木地方狂悖之迹漸已顯露惟詳閱該國
王稟底有唐古忒人將該國草廠民人等肆行殺戮並搶去牛隻
之語復求將漢兵撤回不敢侵犯是該國專欲與唐古忒打仗並
未聲言抗拒官兵雖夷情詭譎未可深信而該國既謂唐古忒欺
陵卽當依案查辦安速了結使彼無所藉口赫特賀見借巡閱爲
名赴後藏邊界查看情形著卽照所請辦理儻該國實有屈抑卽
令派噶箕前來妥速剖斷使與唐古忒之人共釋嫌怨該國與唐
古忒均臣服中國素稱恭順我朝撫馭外夷俱係一視同仁斷不
肯稍有偏袒儻妄動兵戈侵占中國邊界亦斷難姑容赫特賀到
彼卽剴切宣示曉以大義使將濟隴聶拉木兩處之兵速行撤回
聽候秉公查辦鎮撫外夷之法總以信義爲主如能辦理平允該

國具有人心冀其感悔所調乍了等各路土兵數已盈萬但是否
健勇可恃見在止可一面防堵一面與之理論勿輕議征剿並著
知照達賴喇嘛色呼本諾們罕朗結曲丕等善爲設法開導以期
息事安人全在該大臣隨時體察情形相機辦理前此諄諭於廓
夷助兵一事展轉遲延致彼得以藉端起釁辦理不善責有攸歸
今赫特賀甫經到任正可恩威並用折服其心也濟甯營官四朗
格勒於廓兵到時輒退至宗喀實屬怯懦無能著卽革職仍畱於
該處差遣以觀後效諄齡著准其暫畱辦理前藏事務俟滿慶到
任後再行交卸將此諭令知之○諭駱秉章奏參將李輔朝等於
二月初二初八十一等日進剿星子司白虎墟等處賊匪疊獲勝
仗連州三江營均於十七日克復此次打仗出力之該州文武員
弁紳團等著有微勞著葉名琛柏貴查明保奏以資激勵見在該

撫已飭李輔朝並會勦桂陽股匪之知州趙啟玉乘勝越境冀將乳源仁化樂昌一帶賊眾次第剪除葉名琛等仍須督飭地方官弁激勵團練協同勦辦以通韶連道路該省軍情自克復佛山後是否漸有頭緒各屬賊黨能否日就殲滅實深懸盼昨據勞崇光奏張敬修赴封川防勦已移兵攻克德慶州城復會同署知府郭超凡合勦肇慶之賊該督等務將近日各路情形迅速奏聞藉慰殷念又據駱秉章片奏暫委朱岡司巡檢張清鑑代辦連州知州篆務等語該處民獠雜處伏莽尙多急應迅將英德清遠一路廓清遴派幹員前往署理文武各缺以重職守而資彈壓將此由五百里諭令知之○駱秉章奏臣因胡林翼一軍兵力甚屬單薄當飭守備譚瓊林等帶勇赴鄂助勦嗣因逆匪勾結興國通山之賊竄擾崇陽通城蒲圻窺伺南省之臨湘平江譚瓊林之勇未能卽

進三月十六二十兩日賊撲平江北界上塔市營盤臣派知縣何忠駿等會合團勇兩次奮擊斃賊三百餘名賊敗後仍未遠竄見飭各界嚴防至督臣所慮金口不能駐紮胡林翼等應渡江上扼漢川以固荊襄門戶奉諭旨著臣悉心籌畫以見在形勢言之江西湖南雖屢被賊擾形勢猶完湖北安徽皆以重兵討賊勝負尙未可知設湖北水陸兩軍移紮漢川則長江千里盡委之賊其將置東南於不顧乎曾國藩塔齊布水陸兩軍隔在江西前後皆賊聲息中斷更何有直擣金陵之望此臣所未解者一也移紮漢川止能禦上竄襄陽之賊其於荊州並無輕重逆賊水陸並進荊州門戶何存此臣所未解者二也胡林翼等陸軍旣繞道上駐漢川水軍無所依附勢非退守監利之螺山岳州之南津港不可爲湖南門戶計尙未爲失然水軍旣去則武漢黃之克復無期此臣所

未解者三也督

臣

動謂賊眾兵單不思廣濟失利之初賊之尾追

督

臣

者實不過千餘督臣兵勇萬餘亦未爲少乃退黃州未一日

卽退漢口退漢口一日卽退漢川由此而德安而隨州今且退至

棗陽矣是北竄者賊也引賊北竄者誰乎督臣又以餉紬爲詞不

思自武漢克復後督

臣

所得之餉不下二三十萬召募川楚無藉

之徒姦淫擄掠無所不至不知變計仍隨意召募此

臣

所未解者

四也夫荆襄爲中原門戶而武漢爲荆襄門戶督

臣

旣知北竄爲

重何以舍武漢不守而徒顧荆襄旣謂上扼漢川可以固荆襄門

戶何以舍漢川不顧而節節退走且胡林翼王國才等軍若不能

克復漢陽又何能繞道進扼漢川武漢黃德旣均未復胡林翼等

縱至漢川亦以孤軍駐於四面皆賊之地又何能爲荆襄門戶計

乎此

臣

所未解者五也

臣

以大局關繫非輕不得不披瀝直陳得

旨汝所籌尙妥惟議楊需失機各條實屬妄談居多該督固爲退縮有負朕恩尙不至如汝所言汝兩任南撫朕尙冀汝有爲乃自陳衰老豫爲歸息地步無恥已極又奏請飭楊載福等統領外江水營李孟羣回籍勸捐募勇等語批楊載福仍可飭令統率師船赴武昌軍營餘所奏俱不准○署湖北巡撫胡林翼奏自正月初七日賊踞漢陽北岸已形梗塞二月十七日武昌失陷南岸又復蔓延自當急攻武漢乃可內固荆襄惟鄂省素稱澤國非舟師得力不能阻遏賊蹤上年十二月水師三板百餘隻陷入江西內湖其泊外江者兩次被襲復遭風擊壞急回武漢修理湘南紳局添造新船百餘隻復經署臬司李孟羣知府彭玉麟招集水勇千餘於三月中旬趕到金口駕駛甚利即可水陸定期會剿臣之一軍疊次於漢陽進剿頗傷精銳士氣尙可策勵臣於到鄂時卽遣哨

官前往湖南添募勇二千餘名又經湖南撫臣檄飭守備譚瓊林帶勇六百名援鄂均於三月二十四五等日到京口會齊臣思賊踞武昌於城外增修牆濠安置槍礮其循江各岸尤爲賊所嚴防僅由一路進攻難期得力已密飭守備譚瓊林等帶勇二千人由金口紙坊驛以攻武漢之背臣率所部循岸以攻武昌之南與水師會合夾擊副將王國才等從九江回軍近已添造軍械一律修整因思漢陽循江一路可以上通沔陽荊州設全軍集於武昌城外專顧南岸則漢陽之賊必更滋蔓臣卽飭王國才等渡江進紮遏賊上竄之路三月二十四日又進屯沌口沌口山勢可蔽風濤舟師卽依爲營約期會剿如果一處得手仍可併力合攻至西安將軍扎拉芬署提督訥欽所帶兵勇尙未知行抵何處如能迅赴蔡店以攻漢陽之西則賊勢旣分可期得力臣等各營雖口糧缺

乏斷不敢因此稽延坐廢時日得旨覽奏分南北進攻並防旁竄
布置尙合機宜總以實力防剿以分賊勢爲要○追予河南陣亡
知縣孫惠霖建祠陣亡遊擊高行之祭葬世職建祠○壬寅諭軍
機大臣等托明阿等奏疊攻瓜州兼築長圍一摺前此瓜州逆匪
雖連被水師截擊斷其接應之路此次陸路官兵亦經托明阿陳
金綬等分東西路進攻賊眾均各敗竄而二十三日之戰鎮將陣
亡殲賊雖多得不償失且分築長圍意在困其紛竄之路惟該處
溝塍環阻非若平原曠野較易施工而沿江一面亦恐未能堵截
托明阿等固不可輕進失機亦不可以慎重爲名徒延時日惟有
與吉爾杭阿等水陸分攻南北並舉使逆黨應接不暇庶可搗其
巢穴至沿江州地尙有賊蹤窺伺賊中又新添堅利戰船吳全美
等復失去紅單船一隻爲賊所得必致勢更猖獗著托明阿一面

飭令武慶統同曾勉禮等分段防守嚴催李德麟吳全美等實力環攻使江面漸就肅清則瓜州之賊自易剿除儻令水陸紛竄而我軍又屢有失挫則剿辦終無把握托明阿等務當悉心籌畫力求制勝之方毋負朕諄諄告誡之意將此由六百里加緊諭令知之○貴州巡撫蔣蔚遠奏在籍檢討但鍾良捐貲募練實屬踴躍急公應如何獎勵父額懇免罪得旨但鍾良捐貲募練實屬踴躍急公應如何獎勵之處著該部議奏其所請代父贖罪不准行○予江南陣亡總兵官錫綸等祭葬世職○癸卯諭內閣昨據托明阿等奏水師連次剿賊情形本日復據向榮奏師船進剿大獲勝仗等語三山江面賊匪經官軍連次攻擊疊受懲創三月二十六日總兵吳全美等復會督各船進剿賊船地邇聯絡併力撐拒吳全美首先衝進並親然大礮轟擊把總郭定猷躍過賊船紅單各船乘勢衝突拋擲

火罐噴筒斃賊無數外委何慶龍等亦俱奮力進攻賊眾紛紛潰敗副將李德麟帶船向北岸迎剿該逆搶風來拒勢極兇猛勇目劉蔣華持械躍過各兵勇相繼躍登痛加轟洗賊匪除殲擒外均撲江淹斃沈毀賊船無數駛逃各船復被遊擊唐國棟等奪獲多隻其已革總兵王鵬年一軍正在縣剿得手適吳全美李德麟兩軍齊至會同夾擊逆船支持不住悉行敗逃統計先後焚溺大小賊船二百餘隻奪獲大桅多槳快槳等船二十五隻大小銅鐵砲位八十餘尊火藥四千餘斤軍械火器無算生擒僞先鋒陳長順賊目孫元錢永章大中等六十一名其餘殲斃及焚溺賊匪不計其數總兵吳全美副將李德麟激勵兵勇每戰皆捷此次督船進攻大獲勝仗洵屬尤爲出力著先行交部從優議敘藍翎兵丁梁正源前次首先斬鍊極爲奮勇六品翎頂勇目劉蔣華奪大桅賊

船最爲勇往均著賞給五品頂帶並賞換花翎以水師千總補用其餘出力各員弁兵勇著向榮等督飭該總兵吳全美等統帶師船乘勝上駛以期肅清江面毋稍延緩○諭軍機大臣等向榮奏師船進剿三山江面大獲勝仗一摺自上月初七日以後師船連日獲勝甚爲奮勇出力昨據托明阿所奏南岸剿賊情形大略相同而北岸水師葉常春等及江浦六合各勇焚奪賊船賊筏亦復不少果能如此兩岸齊心合剿不患江面不清惟三山礮臺阻我師船上駛之路非得陸路勁兵不能埽除鄧紹良此時是否已移師至江甯鎮卽著向榮催令由三山一帶出剿將該逆礮臺設法攻毀使水師不至阻礙方能上扼東西梁山等處至上游烏江賊船甚多水師尙未能剿至該處而該處逆船轉得隨時援救下游之賊尤須陸路官兵牽制其勢本日和春等奏張光第已進紮張

家寨於三月二十日得有勝仗殺賊九百餘名該處地方距向榮前奏之石磧橋遠近若何是否已偏江岸亦著催令迅速扼剿二十七日續獲勝仗復經沈煥賊划賊艇腰篷洲之賊當不敢與三山江面聯絡武慶防堵浦口之兵亦當在陸路接應與葉常春等其清洲地並著咨會托明阿等妥商籌辦此時水師連次得手正宜鼓其銳氣奮勇直上不可再有停頓而陸兵接應尤爲緊要著向榮等分飭各處江岸一體進偏水陸夾攻不得專恃師船致令深入無援也鎮江近日攻剿情形未據奏報焦山師船亦著吉爾杭阿催令乘時剿金山瓜口一帶賊艇以爲肅清江路之計將此由六百里加緊各諭令知之○僧格林沁奏逆匪竄踞馮官屯伏巢不出臣開挖引河用水浸灌乃該逆所占之處地勢較高初時殊不驚懼臣當將圍牆培厚加高用水車水機水戽盡力澆灌十

數日來圍牆以內高處水深二三尺低處水至四五尺不等見在該逆潛伏之處俱已有水二三尺穀麥雖尙充足半被水浸三月二十日後該逆見水勢日長始行驚慌連次乘夜窺伺向南北礮臺奔撲均經兵勇隨時擊退水勢已經成圍料難潰脫但李開芳狡悍異常斷不肯束手待斃並據投出兩湖人供稱該逆起造木筏長梯意欲捨死奔撲臣因申諭各營悉力嚴防不准稍涉大意再俟水漲尺餘該逆卽須懸釜而炊其時自必情急復鬪正可乘機奮擊見已向東昌府調撥小船數隻一俟到齊卽選擇水兵合力進攻痛加殄洗得旨該逆竄踞馮官屯已兩月有餘何以屢次進攻並未殲除徒有損折見雖長圍已合水灌亦未得手僧格林沁總統諸軍殄茲窮寇遲延日久朕實爲汝愧憤務期乘機迅圖克復不准一名漏網以免南賊覬覦固北方之藩籬洵爲至要○

甲辰諭內閣吉爾杭阿奏辦團人員應否起復據情代奏等語江蘇丁憂在籍左副都御史程庭桂前經諭令幫辦團練見屈服關著准其起復來京所有該處團練事宜卽著丁憂在籍之侍郎潘曾瑩會同地方官邀集眾紳士認真接辦○予江南陣亡布政司理問銜韋杍輝等祭葬世職○四川總督黃宗漢奏報到任日期得旨汝在浙尙恐汝過於急速今在蜀不患失之於嚴惟患失之於緩汝之才力朕保汝實稱川督更望汝驅使羣材自易覩效又奏經河南地方情形批覽奏均悉河南一省實深爲可慮○丙午諭內閣前因王茂蔭奏請暫緩臨幸御園朕因其以無據之詞率行入奏降旨交部議處乃本日據御史辭鳴皋奏因見圓明園奏修園牆工程以爲臨幸已有明徵並以在宮在園爲敬肆之所分安危之當辨所奏殊屬非是圓明園辦事本係 列聖成憲原應

遵循勿替隨時修理補葺亦所常有况未傳旨於何日臨幸乃該御史輒謂眾議沸騰至今未已是欲沽敢諫之名而故以危言嘗試也朕思敬肆視乎一心如果意在便安卽燕處宮中亦可自耽逸樂何必臨幸御園始萌怠荒之念耶當此逆氛未靖朕宵旰焦勞無時或釋無論在宮在園同一敬畏同一憂勤卽如咸豐二年

在園半載無非辦理軍務召對臣工何嘗一日廢弛政事該御史竟以在園爲伴奐優游不期肆而自肆所見亦屬淺陋敬思我

皇祖當蒞政之初適值川陝楚教匪滋事彼時幸圓明園秋獮木

蘭一如常時 聖心敬畏朕豈能仰測 高深設使當時有一無

知者妄行阻諫亦必從重懲處朕豈忍徒博虛譽任臺諫淆惑眾聽置是非於不顧該御史本應治以應得之咎姑念其性懦才庸所見甚小辭鳴皋著撤去掌福建道仍畱監察御史並著交部議

處○曾國藩塔齊布奏目下臣等一軍分爲四支陸路兩支臣塔

齊布駐紮九江羅澤南分剿廣饒相去已在六百里外水路兩支

臣國藩整理陷入內湖之水師駐紮鄱湖李孟羣等回援武漢屯

紮金口相去更在八百里外合則力厚分則力薄水軍自去臘十

二日輕舟百餘衝入內湖遂與外江老營隔絕正月初三日李孟

羣等回援武漢外江之船愈少初五日彭玉麟等因大風壞船全

數開赴上游與內湖一軍相去日遠逮至武漢再陷沿江兩岸數

百里復被賊踞而金口水軍與鄱湖一軍乃不復能遽合矣今水

陸各軍之在江西境內者傷者平復勞者休息羸弱者汰遣添換

仍可復去秋壯盛之氣惟金口一軍與臣等相隔太遠值兩次敗

挫三次遭風以未經修整之船禦武漢方張之賊不得一日休息

此臣等所深以爲慮者也屢據稟報彭玉麟等回漢之師一面與

賊接仗一面修整破船次第完好湖南撫臣駱秉章復以百餘船前往接濟差足重振軍威而陸軍單薄餉項缺乏岌岌乎有潰散之虞論天下大勢則武昌據金陵上游爲古來必爭之地論行兵常道則上下皆賊而臣軍坐困於中段亦決非萬全之策是以臣等一聞武昌淪陷卽再四籌商思所以爲回剿之計顧回剿之策有難言者潯郡據長江之腰膂宜有重兵駐守其間一經撤退則九江湖口小池口之賊皆肆然無忌內犯江西上竄岳鄂均不可知軍士進則氣盛退則氣歉卽剿辦得手未知何日始能重至九江其難一也見在該逆不特攻陷武漢且窺伺襄樊自金口以下上下江面皆爲賊踞內湖水師若徒株守鄱湖不出江面則保護一隅無濟大局若乘此春漲由湖出江不難於衝出湖口而難於出江之後一軍孤懸四面無依上不能達合金口之水軍下不能

速勦安慶之賊艇其難二也湖南用兵已久庫款既空捐項亦竭
本年賊蹤上竄胡林翼王國才等之陸軍李孟羣彭玉麟等之水
軍皆仰給於湖南弁勇萬餘嗷嗷待哺臣等欲再率六七千人前
往江西既難於供支湖南更無可籌撥大抵兵勇積習久住不戰
口糧尚可展緩若有行役之苦戰陣之危不可一日無餉狡者藉
詞鼓譟樸者亦無鬪心其難三也兼此三端實乏良策刻下分兵
往鄂已無可再分若臣等自行回勦則須豫籌兩月之餉臣國藩
上年曾奏請四川勸捐助餉見已委知縣祥麟赴蜀守催餉銀十
二萬兩如此項有著即可恃以爲回勦之用否則姑駐江省城內
與其千里馳逐卒以餉匱而致意外之虞又不如堅扼中段保全
此軍 上諭軍機大臣等行兵之道合則力厚分則力薄自師船
陷入鄱湖賊匪再擾武漢廣饒一帶復有賊蹤竄突該侍郎等水

陸兩軍實有不能不分之勢見在金口一軍相隔雖遠昨據胡林翼奏由湖南添船募勇兵威復振曾國藩若竟回剿楚北恐九江湖口小池口之賊勢必內犯江西而塔齊布陸軍亦無聲援至株守鄱湖徒糜軍餉自應乘此春漲由湖衝出惟出江後既未能遽合金口水軍復不能速剿安慶賊艇不如仍與塔齊布陸軍會合先行攻克潯郡再圖進取惟前此曾國藩師船遇風敗挫漂失多隻見在金陵卽有此等戰船必爲賊匪所得愈以增其兇狡此時鄱湖師船出泊九江能否保護使無意外之虞惟在該侍郎酌度情形妥爲籌畫設或九江難以停泊而武漢情形更爲喫緊卽分兵應援武漢曾國藩仍帶兵船居中策應江面得此一軍亦足斷賊匪往來之路該侍郎所謂千里馳逐不如堅扼中段所奏亦不爲無見當此上下皆賊總宜計出萬全勿以浪戰失機勿以遲回

誤事一切機宜朕亦不爲遙制該侍郎不可因挫失之餘遂致束手無策仍應激勵軍士踊躍用命謀定後動勿負初心以副委任塔齊布攻剿九江近日情形未據奏及豈爲賊氛阻隔竟不能聲息相通耶並著隨時奏報以紓懸繫將此由六百里加緊諭令知之○諭前因曾國藩等奏軍餉不支當諭令王懿德何桂清於閩浙兩省每月各籌銀二萬兩解赴曾國藩等軍營應用嗣據何桂清奏四月分起每月藩庫籌銀一萬兩運司糧道庫合籌一萬兩已委員領解啟程本日據曾國藩等奏稱水陸弁勇有月餘未給餉者有兩三月未給餉者金口一軍口糧不繼卽有潰散之虞見在該侍郎統兵出剿需餉愈殷必當力籌接濟毋誤事機著何桂清再照每月二萬兩之數籌濟兩三月餉需先行撥解江西曾國藩軍營以供支放俟彼處軍餉足資接濟再行按月坐扣至閩省

應解每月二萬兩尙未據王懿德覆奏並著迅速先籌一月餉銀解至江西曾國藩軍營毋稍延緩將此由六百里加緊各諭令知之○丁未浙江巡撫何桂清奏報江西廣信玉山郡縣失守衢州防剿情形並調福建金陵官兵得旨羅澤南已抵廣信自可追剿免致蔓延至省城一切暨撥兵籌餉汝之責無旁貸尤當迅速妥辦○戊申諭軍機大臣等楊需奏北路官兵尙畱信陽懇請飭催一摺據稱賊匪復竄德安見會集各路兵勇分道攻剿惟孔廣順統帶之步隊二千五百名因途中阻雨於四月初二日始抵信陽復經英桂暫畱並因兵丁口糧等尙未豫備以致未能前進請飭迅速來楚等語此項步隊官兵前經英桂奏稱於行抵信陽後暫屯關外與邱聯恩互爲聲援見在楊需擬令常亮等由馬平港進攻德安其漢陽一路派孔廣順步隊兵爲頭隊扎拉芬馬步兵爲

二隊由漢川取道進攻已諭令照擬辦理豫省邊防固屬緊要惟坐守不如迎剿且山東續調之兵一千名卽日抵豫足敷防堵所有孔廣順兵二千五百名著英桂飭令該總兵統領卽日啟程前赴漢川一帶會合進剿並將口糧等項剋期豫備毋得稍涉遲誤該官兵啟程日期並著卽行馳奏前因張之萬奏參徐廣縉不能得力並武生李景瑞控告該革員畏葸退避各情諭令英桂嚴行查辦昨復據黃宗漢奏稱徐廣縉在歸德督捕既有病容又與地方官不甚和協等語徐廣縉係戴罪效力人員旣因病不能得力又與地方官不能和衷著英桂卽將該革員撤回毋庸辦理剿匪事務至徐廣縉被控畏葸退避情節仍著查明參奏毋稍瞻徇將此由六百里加緊諭令知之○諭楊需奏賊匪復竄德安統兵分道攻剿一摺逆賊竄踞德安驅逐民人修壘築臺顯係意圖久踞

以爲乘間北犯之計該督請以常亮訥欽楊昌泗等所帶兵勇由
應山進攻德安而令孔廣順扎拉芬與該督見帶兵勇沿河進剿
漢川意在先復武漢以爲攻賊之所必救固應如此分道進攻惟
訥欽在德安曾經失利致賊入城未可深恃扎拉芬孔廣順多係
生力官軍以之進剿漢川儘可得力若該督再同往漢川則德安
盤踞之賊又生詭計非上犯荆襄卽襲我漢川官軍之後殊非善
策楊需著毋庸前赴漢川卽由隨州星速進兵督同常亮等先復
德安將內河之賊節節掃除再行進逼漢陽其漢川一路卽責成
扎拉芬督同孔廣順等進剿未到之川勇卽作爲扎拉芬之第三
隊兵力亦不虞單薄楊需自正月以來節節退守從未得一勝仗
逗畱隨州棗陽又復經旬而月見在德安賊勢漸堅該督轉擬率
兵南下豈該逆盤踞堅城後路之憂未靖該督遂能克復漢陽不

慮腹背受敵耶常亮已抵南陽該督令其赴德安則須繞道而東孔廣順見在信陽該督令其赴漢川則又須繞道而西取路未免不順惟馬隊不宜於水路不能不爲此調撥仍著催令趕緊趨行或可以其迅速補其紆折本日已有旨諭知英桂令孔廣順卽日出關前進想不日定可馳抵京山一帶如果尙未到齊卽著扎拉芬嚴催前進該督見帶之兵合之原派常亮等之兵不下八九千人務將德安逆賊剋日勦盡不准再事遷延該督何日馳抵德安並著迅速馳奏至所需餉銀見在川陝等均有續報啟程之款前經諭知官文專弁催提與楊需通融分用著該督一體嚴催遵旨分撥嗣後再有續解之款亦著照此辦理將此由六百里加緊諭令知之○庚戌僧格林沁奏逆匪竄踞馮官屯經臣用水攻圍極力浸灌圍隄以內高處有水三四尺低處水深至五六尺據投出

之人供稱賊窖之內亦有水三四尺不等賊匪雖形驚慌堅匿如前四月初十日調到小船數隻十一日先令投出之人向內招呼解散脅從並諭與限三日投誠免罪復因逆首李開芳罪大惡極恐其自盡致逃顯戮假以愛其才幹諭令一併投誠乃該逆仍觀望不出十二日以前陸續投出兩湖等處人二百二十二名逐一查看尚係真心來歸自應仰體 聖主好生之德寬其一綫當卽收錄臣豫料李開芳必藉此另生詭謀當與德勒克色楞西凌阿等嚴密防範該逆果於十三日令夥匪一百四十餘名夾漈荏平等唐難民數十名齊出投降並有李開芳心腹僞先鋒黃大漢卽黃近汶一同投出臣仍佯爲收撫將投出之人全數渡出除荏平等唐之人嚴看外其餘一百四十餘名全數誅戮籌計李開芳見詐降之人均將渡出重濠必以爲墮其術中隄防或懈遂密傳令

齊隊進攻詎該逆防守如常我軍僅偏近該逆土埕燒毀賊窩鋪
數處仍未能搆穴擒渠十四十五等日兵勇奮攻大礮轟擊該逆
萬分窮蹙仍敢求讓一路逃往南省再不北犯等語當卽一面呵
斥不准一面督令兵勇極力圍攻該逆勢不能支於十六日前行
投出就擒除將該逆李開芳及曾受僞職之黃懿端謝金生並李
開芳親隨李添佑譚有淮韋名傳曹得相劉志瀝等八名卽派貝
子德勒克色楞已革侍郎培成天津道張起鵷檻解赴京交惠親
王辦理外其餘逆匪一百餘名悉數正法其被擒收錄復投賊巢
之僞上將軍劉子明一犯情罪尤重當卽凌遲處死臣仍督飭各
營兵勇前往逆窟嚴密窮搜並無一名漏網再此股竄孽既經蕩
平見統各營除受傷患病必須遣回休養外其餘官兵並投誠義
勇尚可挑選精銳臣擬卽督帶赴南協剿惟江南皖楚近日何省

待兵尤殷不能深悉亦未敢專擅伏乞訓示遵行其應行遣散之兵擬先飭令啟程挑贖投誠義勇酌給川資給予免死護照分遣回籍各安生業所有在事出力文武各員可否由臣量請獎敘之處出自天恩上諭內閣僧格林沁德勒克色楞西凌阿奏馮官屯軍務告蔽首逆就擒餘匪盡殲一摺覽奏欣慰科爾沁博多勒噶台親王僧格林沁自授爲參贊大臣後督師勦賊均合機宜忠勇之誠深堪嘉尙前次殲滅連鎖賊匪卽迅速移兵圍勦高唐迨逆匪竄踞馮官屯堅匿不出復多方設法將逆黨首要各犯悉數殲擒北路一律肅清厥功甚偉前經賞給親王著加恩世襲罔替並賞坐肩輿伊兄二品頂帶台吉琅布林沁著賞給輔國公伊弟四等台吉崇格林沁著賞給二品頂帶並賞戴花翎貝子德勒克色楞前在勝保軍營未能迅速奏功本有應得之咎自隨同僧

格林沁幫辦軍務後極知奮勉克成厥功著賞給貝勒銜並賞戴三眼花翎察哈爾都統世襲輕車都尉西凌阿幫辦軍務疊著戰功著賞給三等男爵所有在事出力文武各員並著僧格林沁等查明保奏候朕施恩見在馮官屯逆匪全數蕩平著僧格林沁挑選精銳官兵分起南下該大臣卽馳驛來京陛見以慰廬懷○諭見在馮官屯逆匪全股蕩平北路一律肅清軍機大臣贊襄軍務夙夜勤勞允宜分別加恩以昭優眷恭親王奕訢著交宗人府從優議敘尙書彭蘊章侍郎穆蔭杜翰均著交部從優議敘侍郎瑞麟著交部議敘致仕大學士祁寯藻前在軍機大臣上行走懋著勞勤著一併交部從優議敘其滿漢章京各員均著交部議敘○諭見在馮官屯賊匪悉數蕩平北路一律肅清奉命大將軍惠親王王總理巡防一載有餘勤勞懋著著文宗人府從優議敘惠親王

之子奕詳著賞戴寶石頂奕詢奕謨著賞給頭品頂帶均著加恩
在上書房讀書以昭優眷巡防王大臣除恭親王奕訢侍郎穆蔭
杜翰業經加恩外吏部尚書花沙納都察院左都御史聯順戶部
左侍郎羅惇衍著一併交部從優議敘前戶部尚書孫瑞珍著交
部議敘○諭陳啟邁奏進剿弋陽賊匪大獲勝仗收復城池一摺
江西饒州賊匪分竄弋陽經甯紹台道羅澤南知府李續賓等各
帶兵勇分隊進攻在大水橋瓦夕橋地方斃賊多名其逃入村莊
者以火焚之死者無數復在橋外墜水者數百人生擒僞總制程
禮等多名復於陳家山大松林南北堵禦屢戰多時統計殺斃焚
斃溺斃賊匪不下三千餘人奪獲軍械無數於三月二十一日收
復弋陽縣城擒獲賊黨五百餘名各鄉又按獲長髮賊一千餘名
剿辦尚爲奮勉仍著陳啟邁督同該員等跟剿逸匪悉數殲除署

弋陽縣知縣王蘭被匪破城咎有應得著卽行革職廣信府知府袁泳錫協同收復地方功過尙足相抵著免其置議○諭軍機大臣等本日據僧格林沁奏馮官屯軍務告蒞首逆就擒一摺覽奏欣慰已明降諭旨分別加恩並出力各員准其酌保矣此股逆匪窮蹙之餘猶思負嵎久踞經該大臣等勦力同心勦除淨盡並將首逆李開芳等檻送京師見在北路肅清僧格林沁卽請督兵南下具見忠勇之誠惟該大臣督兵勦賊已歷年餘辛勞倍著朕嘉尙之餘寶深眷念僧格林沁著卽馳驛來京陛見以慰廬懷所有各營官兵及投誠義勇自應分別畱撤惟見在兵勇究有若干該大臣所挑精銳兵勇及應行裁撤各數目著詳細查明迅速覆奏西凌阿仍著統帶各營酌畱兵勇暫行駐紮馮官屯聽候諭旨將此由六百里加緊諭知僧格林沁並諭西凌阿崇恩知之○諭陳

啟邁奏派勇赴粵援剿獲勝並籌餉接濟軍糧一摺廣東樂昌仁化等縣匪徒因江西練勇前赴韶關援剿輒行攻撲始興冀阻官軍進路雖經周汝筠等督帶兵勇進剿殲擒二千餘名該逆已大受懲創而郡圍未解韶關賊匪尙多均自三水清遠英德而來勢頗猖獗韶州與江省毗連陳啟邁固應撥兵援剿其英德等處賊匪蠭聚某名琛等設法繞道接濟未據覆奏見在江西籌撥赴韶兵餉已有四萬六千兩後難爲繼著某名琛等迅速籌款繞道解韶以濟要需陳啟邁仍當不分畛域督飭周汝筠等實力進攻籌濟兵餉毋令缺乏將此由六百里各諭令知之○吉爾杭阿奏准浙江撫臣何桂清函稱江西玉山縣於三月二十七日失守二十八日賊竄常山交界之河安嶺爲浙兵擊退另有大股將由間道徑犯常山請兵援應等因查江浙唇齒相依浙江稍有挫失蘇州

卽行震動實關東南大局當於無可抽撥之中酌量見駐丹陽之浙江副將王懋管帶浙江兵八百名以總兵都隆阿爲統帶先行馳回聽候何桂清調遣一面會商向榮在江甯軍營抽撥都司虎坤元管帶川兵五百名臣又在鎮江軍營抽撥參將魯占鼈管帶川兵五百名以總兵虎嵩林爲統帶於初七初十等日分起進發又接浙江撫臣來函知該逆聲東擊西繞出常山之後於三月三十日攻陷開化縣四月初二日擾及遂安需兵甚急臣當催虎嵩林都隆阿無分兩夜迅速遄行以資援應至蘇州省城爲根本重地切近浙江必應嚴爲之備正會商怡良設法籌防接准向榮咨會已另派提督鄧紹良管帶湖南精兵四百七十名督同虎坤元所帶川兵五百名都隆阿所帶浙兵八百名馳赴浙江勦辦其虎嵩林督同魯占鼈所帶川兵五百名應暫畱蘇州藉資彈壓等因

臣仍確探浙省情形妥籌布置 上諭逆匪於旬日之間連陷三城勢甚猖獗衢郡距杭不遠水路一帆可達必應於衢嚴一帶星速進兵堵剿兼施以杜其奔竄之路吉爾杭阿見已飛催虎嵩林都隆阿所帶之兵趕緊赴浙向榮亦另派鄧紹良管帶湖南精兵赴浙援剿自應如此辦理惟前據何桂清奏富勒興阿見駐兵常山之五里亭該處各隘口防兵尙形單薄羅澤南帶兵早抵廣信是否已撥兵勇赴常山會剿駐徽之周天受是否赴衢均著何桂清迅卽飭催會同截留之閩兵並金陵鎮江所撥勁旅合力兜剿務將攻陷開化之逆匪悉數殲除斷不可稍事遲延致令逆眾蔓延再竄他處至杭城防堵該撫已調乍浦駐防官兵至省並著妥爲調遣協力堵禦蘇城兵勇較單魯占鼇所帶四川兵五百名卽令暫留蘇州藉資彈壓仍著怡良吉爾杭阿嚴飭署藩司楊能格

等認真督辦團練嚴查奸宄豫籌防守事宜以期有備無患其鄧紹良虎嵩林等援浙之兵卽著向榮等迅催啟程均聽候何桂清調遣布置並著何桂清等將近日常山等處剿辦情形隨時奏報以慰懸繫將此由六百里加緊各諭令知之○向榮吉爾杭阿奏鎮江近城廟宇民房雖被賊焚毀牆垣未倒旣阻我兵進擊之路該逆轉可恃爲埋伏臣吉爾杭阿於三月二十一日會同余萬清等督隊前往拆毀適瓜州金山之逆渡江會合鎮城逆匪傾巢來撲我兵槍礮齊施擊斃賊匪不計其數賊始狂奔近城未倒牆垣我軍盡行拆毀四月初九日該逆突出南門意圖割麥經參將周兆熊帶兵擊退田麥未被搶割其自京峴山至象山竄濠築牆工程官軍趕緊完竣將總兵泊承陞所帶挖督船十隻移泊象山並派參將台斐音帶領兵勇附牆紮營杜賊東竄南路自板兒橋至

觀音山亦有隙處見並續築濠牆其城之西南隅有虎頭摩旗兩山相連距城僅半里擬俟南路濠牆告竣卽抽兵在兩山紮營高築礮臺向城內轟擊該逆雖欲負隅勢亦不能至銀山當江甯鎮江之衝該逆於山北連營死守其山南離九華山僅三四里擬俟虎頭摩旗二山營盤紮定再行設法搶占向榮又奏查師船自斬鍊攻出上游亟盼陸軍會合進攻今吳全美等師船於四月初四日進攻上三山續獲大勝適鄧紹良之兵已到江甯鎮於初六七等日堵剿順利疊報克捷足壯軍聲其北岸江浦之石磯橋已經廬鳳道張光第分兵出堵亦俘斬腰蓬洲竄匪多名所有師船糧餉軍火卽可由南岸江甯鎮陸營解運接濟惟三山賊黨嘯聚賊船未盡掃除亟應趕緊夾攻悉行掃蕩然後水陸並進方無後顧之虞臣已嚴飭吳全美等和衷共濟併力進攻直赴上游肅清江

面又奏接據何桂清函稱浙省情形危急非有勇敢大員不足以資統率因檄令鄧紹良統帶湖南兵五百名由江甯鎮兼程赴浙已報於十一日啟程其江甯鎮諸軍見當攻剿喫緊臣復抽撥前敵貴州兵五百名交總兵德安帶往接應與師船會剿三山以免顧彼失此嗣接吉爾杭阿函稱復調虎嵩林川兵五百名赴浙援應臣思浙省兵勇添撥本已不少又有鄧紹良前往統帶足以力遏兇鋒而蘇州接壤浙江風鶴時驚應卽將虎嵩林一軍截畱蘇州駐紮以安人心惟金陵之兵日分日少設該逆分股竄突慮堵剿力有難周一俟馮官屯戴功仰懇飭調吉林馬隊一千名步隊二千名來南俾資助剿均報聞○予江西陣亡遊擊常海等祭葬世職○辛亥諭軍機大臣等昨據僧格林沁奏各營官兵及投誠義勇分別撤畱等語已諭知該大臣將兵勇數目及應挑應撤各

數詳細具奏矣因思投誠義勇一項人非一省良莠難齊其中真心悔罪奮勉立功者固不乏人而勢盛求生仍懷反側者亦復不少該大臣駕馭有方自不至別有他患以後管帶之人卽恐寬猛兩難易滋流弊況此項義勇南省人居多儻帶往南省而有劉子明之類涸雜其中尤爲可慮見在該大臣如何挑選其挑選之後是否分隸各營抑仍令自爲一隊應如何約束以懾其氣誠信以結其心卽著該大臣於回京之先豫向管帶各員密授操縱機宜方爲妥善或卽分隸營伍使散而易制將來卽令充補各營缺額亦屬安插之一法並著該大臣妥爲籌辦至挑贖之勇昨據聲稱酌給川貲給予免罪執照遣發回籍其是否呈繳軍械未經敘及儻該勇等原籍尙爲賊踞或回籍後並無生業可謀又恐流而爲匪加以結隊同行恃有免罪執照沿途騷擾亦不可不防兼恐該

勇等在北路軍營日久一旦投入賊營或熟悉道路或洩漏虛實尤屬可應該大臣務於解散之中熟籌鈐制之法萬不可稍存大意致貽後患將此由六百里諭令知之○癸丑于江西陣亡知縣周鳴鹿等祭葬世職○甲寅曾國藩塔齊布奏據羅澤南林福祥稟稱三月十九日自貴溪拔營至水門埠二十日向弋陽進發羅澤南與李續賓帶湘勇中右兩營爲前隊蔣益澧帶湘勇左營唐訓方帶訓字營爲二隊林福祥與趙如勝率捷勝軍爲三隊文明等率寶勇爲四隊訓導鍾世楨等率志同等軍爲五隊各以六成隊迎敵畱四成隊保護輜重於二十二十一等日由大水橋至五里亭陳家山等處與賊接仗疊獲大勝進攻弋陽縣城西北兩門嗣復環攻東門先後斃賊數千名賊眾敗潰其在城者猶閉城自固湘勇先登諸軍繼入當將弋陽縣城克復等因查廣信爲江西

富饒之區奏報必由之路保全廣信則內可以屏蔽撫建外可以進攻饒州茲幸仰賴 天威弋陽股匪就殲大挫兇鋒卽當跟蹤追剿肅清江西東路以期漸偪皖境此次出力員弁容臣等擇尤奏請獎敘以資激勵藍翎候補把總張以德候補千總易傳武喻能益奮勇捐軀懇恩飭部照陣亡例議卹傷亡兵勇俟查明照例辦理 上諭內閣前據陳啟邁奏官軍克復弋陽已降旨將陣亡之遊擊常海並把總張以德等分別議卹本日據曾國藩塔齊布奏甯紹台道羅澤南等各帶兵勇連獲勝仗見在跟蹤追剿等語所有此次出力文武員弁著曾國藩等擇尤保奏○曾國藩奏自咸豐二年粵匪竄鄂迄今不滿三載而全軍覆潰大敗者五次其間小敗小潰不可勝數二年十二月初四日粵匪以地道轟破武昌城垣逆旗猶未登城而城內外兵勇已狂奔潰散是爲第一次

大潰三年春間署督

臣

張亮基等招撫潰兵添招練勇稍有起色

九月十三日田家鎮失防水陸兵勇同時同奔是爲第二次大潰

其時

臣

函致前督

臣

吳文鎔謂鄂省之兵視奔潰爲故常如再行

收集必須改絃更張另募領兵另招練勇而後可以成軍吳文鎔
未及更改卽被崇綸參劾倉卒出師四年正月十五日十三營均
被踏毀將弁兵勇盡數逃散是爲第三次大潰崇綸青磨等復收
潰兵並廣募湖南四川之勇支持數月餉盡援絕六月初二日奸
細竊發賊旗擁入會垣青磨率兵奔赴湖南沿途逃散大半是爲
第四次大潰

臣

與提

臣

塔齊布等奉命東征幸復武漢督

臣

楊需

復收潰兵又招湖北河南之勇數近三萬兵力不爲不厚楊需屢
次奏咨亦自敘其戰功之多士卒之勁意謂可簡練精銳頓改舊
觀矣不圖廣濟一敗退至新水退至漢口又退至德安棗陽兵勇

或從之以行或遇敵不歸是爲第五次大潰夫古今所以激勵軍士者重賞以鼓好勝之心嚴刑以誅奔潰之卒故可用也今湖北兵勇旣不好勝又不畏刑若因循不改其可慮必更有甚於今日者亟宜變易前轍埽除而更張之凡標兵之求歸營伍者一概不收凡練勇之曾經敗潰者亦不復用大抵山僻之民多獷悍水鄉之民多浮滑城市多游惰之習鄉村多樸拙之夫故善用兵者嘗好用山鄉之卒而不好用城市近水之人臣愚以爲欲另募湖北額兵宜在襄陽鄖陽等屬深山窮谷之中招寒苦力作之民擇其英鷺者編入兵籍假以時日而訓練之與武漢德安等府遠相隔絕使向來之潰兵潰勇浮游無歸者不得改名溷入然後可得一旅之勁兵古之行軍者克一二名城不以爲喜得一二良將數千精卒則以爲大喜失一二名城不以爲憂失一二良將損傷數十

壯士則以爲憂卽數稱精銳之師或積勞而疲或餉匱而散或不和而驕蹇則愈引以爲憂今日湖北之事省城不遽收復尙不足患惟通省無一勁兵精卒乃爲無窮之患雖調他省之兵幸而克復而本省無強兵守之亦終非可久之道故湖北之急務在於另募額兵另招新勇目前之收復鄂垣在此異日之保守楚疆亦在此上年二月間臣具奏江北宜添兩路勁兵外一路沿江岸而下內一路由蘄黃而出宿太請飭袁甲三募壽州光州之勇出漢黃之背不知皇上已俯准施行否如未蒙俞允則江北千里極爲空虛無論江面不能清武漢廬州不能復卽使僥倖而肅清恢復而流賊四散旁出橫逸截我後路已清之江面不旋踵而梗塞已復之城垣不旋踵而復失去冬之事卽前車之鑒伏乞我皇上厯念南服神算獨操縱袁甲三不克西上亦懇飭籌一支勁旅疾

出黃州之背並請飭下湖北督撫另立新軍將前此潰兵潰勇一
概革除蕩滌舊習重振軍威使江之北岸得兩路足恃之兵可合
可分可內可外不特有益於大局卽臣等南岸之陸兵上下兩處
之水師亦皆得所憑藉有恃不恐矣 上諭軍機大臣等曾國藩
奏湖北兵勇不可復用一招武漢等處屢遭蹂躪可見該省兵勇
毫不足恃曾國藩等克復武漢後楊需收集潰兵並招募楚豫之
勇爲數不爲不多乃廣濟一敗幾不復振此時必應簡練士卒力
挽從前積習惟該督所帶楚北兵勇甚多一時恐未能概行裁撤
另募新兵全在該督等嚴飭帶兵將弁挑選精銳裁汰疲羸申明
紀律信賞必罰庶可轉弱爲強其首先奔潰之卒卽應處以軍法
不得少存姑息據該侍郎奏稱襄陽鄖陽民風樸拙招募該處鄉
勇自可得力其宜昌荊州等處當亦可招募以資攻勦前經諭令

該督督同常亮等先復德安節節進剿此時孔廣順所帶步隊官兵諒已抵楚此項勁旅尙屬可恃著卽懷遵前旨迅速進剿毋再遷延胡林翼前奏添募水陸兵勇分布南北兩岸進剿所募各勇能否得力著加意察看分別淘汰見在武漢等處如何攻剿情形並隨時奏報以慰廬念原摺著鈔給閱看將此由六百里各諭令知之○乙卯諭軍機大臣等僧格林沁奏馮官屯見存京旗吉林黑龍江綠營官兵六千餘名均交西凌阿統帶暫在該處聽候諭旨等語該處官兵除裁撤歸伍尙存京旗兵若干名吉林兵若干名黑龍江兵若干名綠營兵若干名係何省何營統計馬隊若干步隊若干著西凌阿分晰開單詳細具奏見在馮官屯軍務告竣直隸糧臺著卽裁撤其見存官兵著暫畱順天糧臺通永道覺羅海瑛會同山東糧臺兗州府知府某圭書辦理支應將此諭令知

之○浙江巡撫何桂清奏賊擾常山開化經官兵擊退竄往徽境見飭堵剿情形得旨該鎮是否退縮無能該道府等有無扶同捏飾著一併確查迅速覆奏勿任貽誤地方○丁巳諭軍機大臣等扎拉芬楊需奏武漢賊匪上竄德安我軍進攻並常亮失利退回扎拉芬被圍衝出受傷各摺片覽奏竇深焦急此次賊匪大股分撲平林市長林岡楊昌泗等迎剿先勝後挫常亮所帶馬隊退回時反將步隊衝亂扎拉芬營盤被圍該將軍受傷潰圍而出見在逆勢猖獗已極襄樊一帶情形甚屬喫重前據樂斌等奏稱先後調派兵勇數千名歸顏朝斌統帶赴楚又據僧格林沁奏派劉衡等帶投誠義勇前往助剿此項兵勇諒已陸續抵楚著該督等迅速催提奮力攻剿扎拉芬見在是否由南路赴襄陽該郡係糧臺重地且尚有後起步隊該將軍到彼一面嚴密布置一面仍趕緊

整頓與得需諸軍合力進剿楊需屢次挫失若再不知奮勉致逆匪肆擾襄樊一帶自問當得何罪見在往平縣馮官屯賊匪悉數殄滅投誠兩湖義勇僧格林沁已派員管帶回籍交該督等調遣並據該大臣見派勇目詹起綸等八名於到楚後暗探賊營設法解散該督卽當隨時察看情形剿撫兼施妥爲辦理將此由六百里加緊各諭令知之○諭見在楚北賊勢猖獗亟宜派兵策應著西凌阿於馮官屯駐紮官兵內挑選綠營步隊精兵二千名配齊軍裝器械揀派得力將弁管帶卽日啟程前赴湖北楊需軍營聽候調遣並將該管兵啟程日期先行具奏毋稍遲延將此由六百里諭令知之○諭本日據英桂奏探聞賊竄隨州一摺此次逆匪分股陸續上竄德安據河南所獲逆犯訊有欲由隨州棗陽竄往襄樊之供南陽一帶亟應加意嚴防見在扎拉芬於五里墩營盤

被撲後是否赴襄整旅尙無確信楊需常亮均退去唐縣鎮駐紮
賊勢愈張我兵更形單弱若襄陽有警豫省邊防喫重該撫已知
會孔廣順卽由關外拔營向應山進發急宜迅速催該提督徑赴
隨州會剿遏楚北賊鋒卽以保護豫省邊界至常亮挫失半由所
帶馬隊於地勢不宜不如飭令常亮將馬隊退紮三關以防豫境
將此由六百里加緊諭令知之○諭英桂奏牛鑑在正陽關防堵
見因患病請派員馳往接辦等語正陽關地方緊要牛鑑年衰患
病恐致貽誤自應派員接辦惟據稱豫省鎮道大員俱分駐要地
防堵一時無員可委自係實在情形著和春福濟迅卽就近派委
妥員馳赴正陽關接辦防堵事宜並飭牛鑑俟接手有人再行交
卸以重防守將此由五百里諭令知之○戊午諭內閣和春福濟
奏廬州連日圍剿並外賊復至大加斬馘一摺廬州逆匪屢有外

賊來援均經隨時擊退四月初七八九等日將水西門城牆攻陷丈餘我兵奮力進擊用連環槍礮佐以噴筒火箭斃賊甚多因值大雨城河水漲未能越過連攻至五晝夜該逆仍復死守十四日復有賊匪二千餘人在煙墩集之西萃廟地方紮營三座欲來接應和春等統兵馳往迎擊斃賊無算並殲騎馬賊二名餘賊奔逃官兵追殺一面將賊營圍打營內賊匪越牆逃竄兵勇擁入盡力砍殺將賊營毀爲平地趕殺十餘里約斃賊三四百名奪獲礮位軍械甚多廬城賊匪外援疊至均被官兵剿退城中餘匪情形已極窮蹙著和春福濟督率兵勇迅速合圍力圖克復毋再玩延○己未諭內閣湖廣總督楊需前因武昌失守降旨革職仍暫畱本任責令戴罪自效迨逆賊上竄德安該革督以防守襄樊爲名由隨州以至棗陽節節退守疊經嚴旨催令進剿復以兵勇未集遷

延觀望迨西安將軍扎拉芬由陝帶兵行抵隨州於五里墩地方與賊接仗被圍該革督坐擁重兵近在數里之間並不實力救援反催調相去較遠之揀發知府崔蘭馨等前往接應以致該將軍力竭陣亡實屬懦怯無能有心延誤該革督自廣濟兵潰以後湖北逆匪復肆披猖其貽誤之罪何堪悉數朕僅予薄懲方冀其振刷精神力贖前愆乃數月以來毫無布置孤恩溺職實堪痛恨楊需著卽革任仍交官文差遣儻再不知奮勉卽行從重治罪西安副都統常亮昨因救援不力降旨摘去頂帶茲據楊需查明該副都統於奏調往援時已遠赴唐縣鎮地方臨陣退避可惡已極常亮著卽革職仍畱營效力以觀後效○諭逆賊李開芳等以邊境莠民甘心從逆輒敢糾領黨與竄擾畿疆實屬罪大惡極見在北路肅清除逆首吉汝元業經殲戮林鳳詳已由連鎮軍營解京正

法外所有首逆李開芳見經僧格林沁擒解來京著卽凌遲處死梟首示眾其授有偽職之逆犯黃懿端謝金生並著凌遲梟示從逆之李添佑譚有桂章名傳曹得相均著卽行處斬一併梟示以彰國法而快人心○諭陳啟邁奏攻剿饒州賊匪大獲勝仗收復郡城一摺江西饒州賊匪自竄踞郡城以來負隅抗拒四出擾害經陳啟邁派令都司吳錫光等率領水陸兵勇前往攻剿三月二十八日吳錫光派候選府經歷縣丞胡應奎等督率戰船沿河進攻吳邦柱等帶領兵勇堵剿山坳伏賊兼攻北門又令石玉等各率兵勇四面合圍逆匪突出五大股約有六千餘人蠶擁而來吳錫光率各路兵勇施放連環槍礮斃匪三百餘名逆眾敗退我兵乘勢衝殺入城該逆分爲七股拌死巷戰我軍亦分九隊截擊殺賊一千二百餘名餘匪由東門逃出分路奔竄卽將郡城收復此

股逆匪自竄踞饒郡以後分擾樂平德興弋陽等縣經吳錫光帶領水陸兵勇分路進攻大獲勝仗克復郡城辦理尙屬妥速著陳啟邁督飭吳錫光等乘此聲威移師都昌相機進剿以清江境○諭軍機大臣等見在湖北逆蹤上竄隨州其荆襄等處及河南邊境地方極形喫重常亮所帶馬隊官兵見經楊需撥赴信陽三關扎拉芬所帶官兵多已折回棗陽襄陽見尙無人統帶著官文接奉此旨星速馳往隨州接印任事楊需軍營兵勇屢經潰散必得加意整頓挑選精銳裁汰疲弱方足以資得力前由僧格林沁軍營撥往投誠義勇並著妥爲駕馭俾知威德畏威以助攻剿新授荊州將軍綿洵到任需時所有將軍印務著載增暫行署理該處防守事宜卽著妥爲布置不得專待西凌阿來荆致形諉卸至孔廣順所帶官兵見經馳赴應山協剿著卽星夜趨行一路剿洗遏

賊北竄扎拉芬所帶官兵卽交孔廣順一併統帶將此由六百里加緊諭知官文載增並傳諭孔廣順知之○諭見在湖北賊勢猖獗荆襄情形甚爲喫重著西凌阿迅速馳赴湖北就荊州襄陽所有之兵辦理荆襄一帶防勦事務卽將啟程日期先行具奏毋得稍有遲延其馮官屯見存官兵著西凌阿選派得力大員暫行統帶聽候諭旨將此由六百里加緊諭令知之○諭楊需奏扎拉芬因傷身故一摺扎拉芬於五里墩地方與賊接仗楊需近在數里之間並不實力救援反因槍礮之聲已息疑其已赴襄陽迨經敗兵馳報始知該將軍已因傷身故種種貽誤殊出情理之外楊需見統兵勇爲數不少著將撲竄隨州之賊迅速殲除以期進攻德安遏賊上竄至扎拉芬所統陝兵均屬勁旅除潰亡以外所存尙有若干並著楊需設法招集隨營攻勦不得俟孔廣順之兵到齊

始行前進儼再不知愧奮則畏葸貽誤之罪斷難倖邀寬宥也將此由六百里加緊諭令知之○以瑞麟爲西安將軍調載齡爲戶部左侍郎仍署陝西巡撫國瑞爲刑部右侍郎以崇實爲工部右侍郎景廉爲內閣學士○以官文爲湖廣總督由荊州將軍遷○于湖北傷亡西安將軍扎拉芬祭葬世職○庚申諭內閣武職大員有操練弁兵之責理應騎坐馬匹以習勤勞儼或自耽安逸平時出入違例坐轎一旦身臨行陣安望其奮勇爭先爲弁兵表率向來武職坐轎例禁綦嚴犯者必加懲治曾於乾隆嘉慶年間疊奉 聖諭訓誡明切自應永遠恪遵乃近年以來漸就廢弛上年浙江黃巖鎮總兵湯綸卽以擅坐肩輿被參本日復據御史宗稷辰奏浙省武職大員類皆違例坐轎甚至閩省帶勇來浙之偏裨小校亦多效尤等語浙省如此他省亦恐不免見在粵匪未靖征兵會勦

各省武職大員應如何實心操練勤習技藝以期緩急足恃若惟知自圖便安不思振作將來營伍積弊更不可問著再行通諭各直省駐防將軍副都統等及提鎮各員儻有違例坐轎者一經奏參必治以應得之罪其駐防城守尉以下綠營副將以下犯者尤當從重治罪決不寬貸將此通諭知之○諭陳啟邁奏逆匪由興安竄入廣信旋經官軍克復一摺江西興安縣地方於三月二十日有逆匪萬餘人由安徽婺源縣竄至代理興安縣知縣狄上林因先期帶兵出城致被匪徒撲入隨會同遊擊謝必魁等督兵圍攻擒斬賊匪一百數十人當將縣城收復二十三日餘匪竄至廣信署上饒縣知縣蔡中和嬰城固守因大雨不能燃放槍礮被賊攻陷城池蔡中和巷戰被執罵賊殉難敕授雷封並署廣信府經歷姚益謙等同時遇害維時廣信府知府袁泳錫正會同浙江甯

紹台道羅澤南與安慶府知府李續賓等紮營烏石山下二十五日賊分三股來撲官軍奮力攻擊斃賊八百餘人奪獲旗械多件二十六日賊復分路來撲斃斃長髮悍賊數十人賊眾敗逃官軍乘勝追趕復殺斃千餘人偽尙書范姓等均被斃斃被焚及溺死者不計其數二十七日五鼓各營兵勇奮力進攻踴躍登城袁泳錫亦率兵衝入賊從東門遁去墮水死者無算適署撫州府知府林福祥帶兵趕至生擒偽軍帥詹宗保等十名餘匪奔竄玉山被署知縣張鳴岐等擊退此股賊匪由婺源竄陷興安廣信郡縣城池經羅澤南等督率兵勇剋日收復辦理尙爲迅速在事出力員弁著陳啟邁等擇尤保奏無許冒濫仍嚴飭各該員弁等將逃匪按除淨盡毋畱餘孽○予江西陣亡知縣蔡中和等祭葬世職建祠教授雷封等附祀○辛酉諭內閣葉名琛柏貴奏省河勦匪水

陸連獲大勝一摺廣東番禺縣屬匪船竄至黃埔長洲河面經葉名琛等派往東園烏涌堵捕之守備曾琪等督飭水勇分隊進擊水陸攻剿計燬船一百七十餘隻焚燒三村賊巢二千餘間殲擒溺斃將及萬計兇鋒大挫出力文武各員准葉名琛等覈實保奏所有奮勇殺賊力竭陣亡之護理水師遊擊守備曾琪署水師守備千總曾鵬高歐松茂外委朱耀宸額外鄭洪魁外委鍾光均著交部從優議敘○諭葉名琛柏貴奏剿辦省城西北一帶逆匪疊獲大勝水陸解圍一摺廣東附近省城各匪疊經葉名琛等督兵痛剿上年十一月間尙有匪徒萬餘人在石井石門各鄉屯聚十一月初四日至二十五等日經署遊擊曾廷相等各員接仗二十餘次先後斃賊共計八千餘名生擒一百四十餘名燬賊蓬寮六百餘間並將石井墟等處賊巢一千餘間一律焚燒並先後斃賊

二千八百餘名生擒八十名匪船盡絕河道業已廓清省城水陸各路同時解圍居民安堵如常勦辦尙爲得手仍著葉名琛等督飭文武各員弁將附近省城各鄉餘匪悉數殲擒搜捕淨盡毋留餘孽所有在事出力員弁著擇尤保奏候朕施恩其傷亡兵勇著一併查明咨部議卹○諭葉名琛柏貴奏擊退高明縣賊匪殲擒殆盡一摺上年六月間廣東高明縣城被匪闖入經署知縣張作彥等調集團練督率壯勇前後夾擊斃賊二百餘名閏七月初三日各團齊集復在附城要路斃匪三百餘名八月初間該署縣等添募客勇在三板村地方殺賊一千餘名十一月初二日復會同署把總藍廷彪帶勇至大平都勦捕殺斃賊目杜錦剛並賊黨四百餘名三洲墟賊廠及各海口大小賊船均經焚燬賊由陸路來攻兵勇及伏勇齊出斃賊二百餘名及賊目杜元一名該匪逃至

海口溺斃無算地方一律安靖仍著葉名琛等嚴飭該文武將在逃餘匪搜捕淨盡無任竄逸署高明縣知縣張作彥署城守把總藍廷彪等本有應得之咎惟旋經督率紳民兵勇合力擊退賊匪殲擒殆盡功過尙足相抵均著免其參處○諭前據刑部奏旗民與宗室覺羅鬪毆重案引斷未能畫一請酌定章程當降旨交宗人府查覈具奏茲據恭親王奕訢等詳查覆奏嗣後毆傷宗室覺羅至死者著均照本律擬斬以符例意至從前引斷未能畫一刑名出入豈容遷就總應按例辦理無例者始准援案况例文所載本屬明晰其毆傷未至死者仍按下手曲直情形分別辦理該部所請添舉則例之處著毋庸議○諭軍機大臣等本日據英桂奏湖北賊竄隨州逼近南陽德安仍有賊蹤請飭撥北路勝兵前往一摺見在河南省南路邊防極爲喫緊湖北攻剿之兵尙形單弱

均非厚集重兵不足以資剿辦所有馮官屯軍營存兵除步隊二千名業經派員帶往湖北並令健銳營內外火器營官兵分起回京外其餘四千名著西凌阿迅卽一併統帶悉數啟程路過河南善截畱一千五百名交英桂調遣以資防守此外官兵該都統卽行帶赴湖北會同官文等合力攻剿將竄踞隨州之賊趕緊殲除毋任蔓延前僧格林沁奏兩湖投誠義勇派台候選知府劉衡等管解前往湖北此項義勇卽歸西凌阿統帶尤應妥爲駕馭不可稍涉大意致貽他患將此由六百里加緊諭令知之○諭英桂奏探聞賊踞隨州逼近南陽德安仍有賊蹤請飭撥北路勝兵前往應援一摺豫省南路接壤楚北自德安告警信陽已形喫重況隨州更被占踞南陽密邇賊蹤自應添撥重兵以資捍禦前楊需奏扎拉芬於五里墩受傷後旋卽捐軀已降旨將楊需革任授官文

爲湖廣總督帶兵馳往勦辦見在楊需復退至棗陽其浙河唐縣鎮等處賊勢蔓延並於隨州迤北擄糧昨已有旨諭令西凌阿赴荆襄一帶防勦本日復諭該都統迅速起程將留駐馮官屯各營官兵六千名全數帶往抵豫時留兵一千五百名著卽由英桂派令相機堵禦加以常亮移紮三關之馬隊及邱聯恩等兵力儘可擇要分防此次西凌阿帶兵前往若能乘此得勝聲威不但郭匪可望殲除兼於豫境邊防大有裨益英桂惟當竭力堵遏嚴飭在事文武勿稍鬆懈以固疆圉將此由六百里加緊諭令知之○于廣東陣亡知縣李福培等祭葬世職